

四庫全書

集部

欽定四庫全書

集部
勉齋集

卷

三十九
四十

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官中書臣王家賓

謄錄監生臣何均

欽定四庫全書

勉齋集卷三十九

宋黃榦撰

祭文

祭臨江劉靜春先生文

嗚呼去古愈邈道學不明末俗喧囂匪利則名豈無大
賢挺生斯世彼昏不知孰發其蔽吁嗟先生天資絕人
心平氣和志篤行醇博極羣書該貫一理尊敬師儒考
訂非是閨門雍雍兄弟怡怡憂國以誠撫民以慈篤學

力行後進是式推已愛人尤極懇惻人之有善稱道掄
揚不責其備而取其長人之有過箴規訓誨不顧其違
而冀其悔先生此心可謂至仁芝菌鸞鵠同然一春吁
嗟先生今其亡矣昏迷恣肆誰逆其耳幹也顓愚少無
師承年已踰冠始來廬陵樞衣趨隅歷問所學直指前
修以警後覺乙未之冬歲暮天寒奉命造朝艤舟江干
折簡來呼治子行李武夷金華惟子所止二三偉人為
世宗師莫啟其行已背而馳廬山之陽杖履幾月別後

貽書勉厲不絕尚期他年執經遠遊南北奔馳有志未
酬千里計音哀暮悲痛哲人云亡豈曰私慟天不佑善
斯文已孤舉世滔滔斯人何辜武夷夫子先生所敬小
子不敏幸獲將命敢不蚤夜益堅所行庶幾有聞如見
先生收淚緘辭寄觴以醉惟神之靈鑒此微意

祭丁復之文

嗟嗟復之如君之賢而止此耶信耶非耶病革之書伯
休文之之訊胡為而至于耶勉我以學告我以死捧

書長號濡淚滿紙嗚呼悲夫其何有于余逮死而不已耶以復之之惓惓于余則余之恨于復之者抑可知矣荒村之陬茅屋之底春雨對床秋風連騎挾冊承師質疑問義退歸切磨夜分乃寐往來七年終始一意至今潭溪之湄山翁野稚尚能言之善哉二人者之為友也孰謂復之而遽棄耶賢哉復之少有大志蟬蛻于名利之場鞭加于聖賢之地視其貌若不勝衣考其所操凜然有君子之器先民有言順事而存得正而斃達人大

觀生死一致有如復之固亦可以無愧矣顧余未死則將奚恃余目孰視余足孰履扶持一傾顛沛頓委則余之所恨寧有止耶家空四壁目極千里聞喪不前朋友之恥緘辭寄哀幸勿予鄙自冬徂春聚糧千里庶得以哭于殯弔其父而撫其子也嗚呼哀哉

祭林丕顯文

嗚呼人心厚薄之不同古今人物之所以異也古人不
可復見則能如古人者誠足貴也如君之賢篤厚誠實

之風求之古人亦可以無愧也慕親之孝顧瞻松楸常
若承其志也愛子之慈從容訓誨常恐傷其意也東萊
先生君之故友誡首受書凜乎有所畏也鄉曲後進纖
芥之善踵門願交未嘗有所棄也急義之誠不必家之
有無好學之篤不知老之將至也至于應酬交際懇惻
繾綣貴賤長少同一致也雖兼善之至不能自達而婆
娑閭里亦可以激薄俗之澆浮而振古風于既墜也曷
為不永其年而遽嗇其志以及于地也耶丙申金華師

席連侍有過相箴有善相示握手劇談達旦不寐分雖
友朋恩若同氣十有八年之中離合不常而相予之情
不忍一日離也去歲之冬君嘗與余言曰吾老矣無所
合于世殆將結廬于荒山之顛要子為旬之集則吾之
願遂矣孰謂其反視君子殯而哭君子位也耶嗚呼已
矣君不可復見矣亦將潔身厲行以慕君之義而已勉
君之子以述君之事而已薄酒哀辭亦庶君之來暨也
嗚呼哀哉

祭晦菴朱先生文

吁嗟斯文有廢有興其廢也三綱淪而九法斁其興也
大經正而大誼明是其所關豈不甚重而夫子胡乃一
疾而隕其生若昔孔孟迄于周程異世相望各以道鳴
迨去古之益遠當異說之縱橫其精微之蘊既不可得
而見幸而托諸文字之間者亦且踵訛承舛而莫見其
全經自夫子之繼作集累聖之大成其知生知其行安
行其襟懷洒然光風而霽月其言動肅然左矩而右繩

望之者雖憚其貌莊而言厲即之者常樂其心和而氣
平資本高明而志道益遠性實通敏而索理益精主敬
以立本而動靜無間格物以致知而毫釐畢呈大而察
諸天地陰陽之變遠而驗諸古今事物之情仁義禮智
不離五性之所賦灑掃應對洞見一理之所形其精義
入神既有自然之權度則窮經考古莫不炳然如日星
謂中庸為造道之闡奧謂大學為入道之門庭究本義
以言易而深得卜筮之旨點小序以正詩而力辨雅鄭

之聲探語孟之編而如對鄒魯之問答述周程之書而一新濂洛之典型至于星厯地志曲藝小數不可以悉究騷人墨客窮年卒歲僅見其可稱莫不折之以理而各造其極蓋亦得之于天命而非學可能信本深而形鉅故末茂而聲宏其立朝也危言正色屢形于感慨其臨政也仁民利物一本于哀矜立綱陳紀而不為苟簡之計推姦摘伏而不求姑息之名當就而就事不事乎矯激可止而止力辭夫寵榮積者厚而施自退身雖否而

道則亨婆娑丘園湛若無營上以尋墜緒之茫茫下以
警瞶俗之冥冥諸老先生咸資于質正後學小子幸得
于師承肆逃禪之論者莫能以惑世騁雜伯之說者不
容於抗衡傳聖統以繼絕學正人心而息邪說夫子之
功大矣則一存一亡豈不有係于斯世之重輕嗚呼蒼
天曾是莫聽曷不百年大命以傾榦丙申之春師門始
登海語諄諄情猶父兄春山朝榮秋堂夜清或執經于
坐隅或散策于林垆或談笑而春容或切至而叮嚀始

受室于潭溪復問舍于星亭庶依歸以終老指河山以
為盟胡睽離之未幾忽夢奠乎兩楹奉疾革之貽書對
使者而涕零亟奔走以來歸乃獨睹乎丹旌悵此生之
疇依魂欲絕而復醒念屬託之至重豈綿力之能勝想
音容而奉遺書敢不蚤夜以服膺惟力策乎駕鈍庶無
愧于英靈奠卮酒以陳辭尚有鑒于微誠

又祭晦菴朱先生文

嗚呼先生百世之師天啟我人篤生于茲海內之士聞

風以馳垂橐而來相載而歸榦于朋儕質劣志卑憫其
鈍頑誨誘孜孜既養其端復發其知既揉其偏復克其
私燕申則侍步趨則隨適來則喜已去則悲別不踰年
書不越時父生師教天覆地持二十五年恩絕等夷嗚
呼曷辜而不愁遺日月推遷寃宥有期夜臺冥冥藏棺
蔽帷海內之士齋咨涕洟使榦之愚俵俵何之孰策其
慵孰指其迷孰顧孰瞻孰扣孰咨維今之春升堂樞衣
笑語溫溫神完氣微鄉人見招意不忍違命曰汝行我

志未衰閩山荔枝其實離離我以扁舟訪汝以嬉自春
徂冬如慕如疑誰知此言終天永辭前有書堂燕居
怡怡後有精廬諸生焉依有園有池清溪之湄履迹
雖存音容莫追獨有遺書千古具垂句索字尋口誦
心維亦有良朋攝以威儀有善相聞有過相規毋誘于
利毋蹈于非毋溺于安毋憚于危庶幾師門涓埃是裨
靈輒啟行清酒一卮撫棺長號天乎痛哉

辭晦菴朱先生几筵文

惟先生之靈碩大宏博以成已為本以成物為用自其
學之不厭而推之于誨人之不倦蓋與天地同量而聖
賢同心也所以興起斯文惠顧後學之意切矣餘也不
才去年之春里之父兄以其從遊于先生之門久而意
其粗有所聞也帥其子弟而相與講學焉餘方固辭而
先生督之愈力是以不獲隅坐執燭以聽垂歿之誨至
今抱恨無有窮也今先生練祭近一二月而里之子弟
復有所請幹竊惟先生之治命不敢違鄉人之善意不

敢遂捨先生之几筵以行不能築室于塲以終三年之禮俛仰太息絕愧古今卮酒告行痛徹心肺

晦菴先生小祥祭文

先生兮道德百世兮彌彰天地兮齊壽日月兮齊光自古兮有死先生兮不亡殘子兮何之菟結兮慘傷嬰兒兮失哺逆旅兮悲鄉德容兮在望佩服兮琅琅髣髴兮耳目顧瞻兮茫茫歲月兮不淹遽易兮星霜矯首兮武夷白雲兮高翔褰衣兮無從寫哀兮此堂良友兮駢羅

賢孫兮侍旁先生兮夙心英靈兮未忘瑶席兮玉斚桂
酒兮椒觴靈來兮何許涕泗兮淋浪

祭趙舜和文

朋友之誼人之大倫豈曰燕遊以輔吾仁昔我兄弟退
居鄉鄰交遊親厚非趙則陳責難規過握手諄諄自始
至今餘二十春有不見者未嘗涉旬維君之年少我數
人發軔仕途名滿縉紳胡為一疾遂隕厥身使我哀顏
慟哭酸辛君所可憾有志未伸亦有可慰諸君訖訖人

之賦命脩短莫均君則往矣我老孰親千里脩途東越
南閩撫棺長號欲往曷因緘辭寫哀涕淚霑巾

祭任舶并女兄文

昔我先人峻節山峙始奇女兄不與凡子君來登門二
姓咸喜義忘我貧德不以齒君資粹和兄輔以理克成
厥家既多受祉振振兩甥復濟其美歲晚婆婆榮耀閭
里相樂以生亦偕以死誰無室家鮮克有是君擢巍科
名聯伯氏娶而卜居相望枌梓朝嗟夕怡苦樂相倚四

十餘年親狎誰比自榦之遷武夷之趾効官荆吳一別
半紀二老貽書蠅頭滿紙謂當期頤益介福履云胡相
繼一疾不起病不及知歛不及視捧書長號欲往暫止
終天之痛有淚如泚

祭范伯崇文

道之不明患無其徒或義之談而利是趨或始之銳而
卒乃渝人無常心吾道始孤在昔夫子發揮聖謨奮然
而前摳衣坐隅豈無其人孰公之如公資簡嚴濟以怡

愉早登師門誡首受書致知力行無替厥初幹也凡庸
從師以居所敬惟公公尤眷予尚期晚年依公里閭孰
謂老成忽焉以徂師亡道微捨公孰扶孰剖我疑孰砭
我愚孰知我哀嗚呼天乎

祭陳寅伯文

嗚呼寅伯而止于此耶福善禍淫孰主張是耶剛方正
直胡橫以天貽韋婉孌老不死耶所謂天者不可信而
理者不可恃耶人生斯世切磋講貫不可無友相知以

心相期以道孰有過吾二三子耶饑寒所驅奔走四出
尚期他年合并卒業今存者尚不可見而九泉之下烏
可復起耶自吾仲氏之亡已不勝索居之歎今又失吾
寅伯使兩家二弟形影相弔銜哀抱痛何時而已耶今
遣吾子哭君之喪于西山之側緘詞遣奠不自覺其淚
之如此也

哭朱文公文

在昔夫子性嚴氣剛規矩準繩動止有常君承其顏惟

恐或傷在昔夫子朝圖暮書遑恤其家孰有孰無君服其勞使若有餘內睦姻親外交朋友歲時享祀穀核清酒囊篋瑣碎俾無遺漏非君之賢孰左孰右餘之從遊餘三十年四海兄弟兩世婣婣于君事親知君之賢人之百行非孝孰先劬勞造家黽勉旦夕顧我倉庾相我黍稷跋涉險阻忘寢與食庶無饑寒以安厥室室家諍諍男女洗洗且訓且誨為婚為姻有疑未祛有願未伸竟以勞悴而隕厥身為子而孝為父而慈君可無憾人

誰不思千里相望銜哀致詞嗚呼傷哉孰知我悲

祭徐子宜文

定大策于甲寅之初公同其憂而不同其樂排大難于
甲寅之後公與其危而不與其安此當世所以為公歎
也利不私于身而忠存于國身不享于今而名顯于後
則公亦何所憾耶和好方通流庸未復人情易變正論
難伸公于此時奄然而逝公則無憾國其謂何幹一介
書生無所肖似獨于蚤歲遍交諸賢我特于公未嘗識

面公于我厚有以露章我知公賢不敢私謝是則相知以心相期以道亦未有如是之深也公以喪歸俯伏道左一觴以薦有淚盈襟

祭高應朝文

惟公秉剛直不撓之德博碩有用之才而位不顯年不壽此榦之所以為公惜也當變異屢見之時人情危疑之際而賢者擯能者伏此榦之所以為世惜也榦也聞公之名于數十年之前為公之屬于三四月之頃公之

行事表表著見者夫人而能知之干戈擾攘人方應酬
之不給而公獨長慮卻顧築城鑿池為不可拔之計帑
藏空竭人方支吾之不暇而公獨捐金結客振窮恤滯
有不勝用之財此豈人之所能強為亦豈人之所可輕
議哉此則幹之所目擊而心服者也數月之前公嘗以
書屬幹曰晉有祖逖人莫有知之者今之世未嘗無祖
逖也知之者其惟子乎幹何足以知公者世之知不知
亦何足為公道哉公其死矣顧使齷齪庸凡之徒紛起

而謀天下之事是則重可為斯世惜也千里緘詞一觴
遣奠公其以為真知我者哉

祭劉正之文

嗚呼正之天資偉然不出戶庭而相得詩禮之深不越
里閭而涵泳師友之淵故其學積于身行著于家事業
施于官而賙卹遍于親故至其大節之不可及者則不
為威惕而不為利遷富貴人所趨而義所不可則寧沈
伏于州縣之吏權勢人所畏而意所不樂則或怒罵于公

侯之前退休于家而以遂初自命是豈一時榮辱禍福
之所能拘牽者哉榦之定交三十餘年歲晚論心金石
其堅蓋將卜鄰於屏山之下而依我友以終老孰謂先
師既歿季通伯休相繼以逝今又哭吾正之則自今以
往善孰吾告而過孰吾鑄耶然則失我良友既足為斯
世惜而尤榦之所以深自憐也嗚呼痛哉

祭王子正文

嗟夫士風之薄至此極也少而為學志趨卑鄙意思凡

庸無可用之實也壯而從宦營私背公憚煩習惰謾不知其所職也至于決性命之情以饗富貴則左拏右攫東馳西騖無所不用其力也中州大邑滔滔皆是固無以責夫遐荒下國也嗟哉王君一代之英南方之特也策勲詞場奮發踔厲潛心道誦涵泳從容躬行實踐非外飾也蜚聲宦途焦勞國事致身朝列罄竭忠悃鞠躬盡瘁毋自逸也然其視名利之去來泊然若浮雲之在太空一毫非義則欲屈之以萬鍾之貴而不可得也士

大夫而皆若是何患風俗之不振而民生之不厚也如君之賢固宜享期頤躋貴顯為世則也胡積之厚報者嗇也胡用之遲奪者速也榦亦同門多艱棘也慇懃顧念感君德也哭君之亡病弗克也奔君之葬阻行役也緘辭寫哀不知涕淚之橫臆也

祭曾光祖文

有倬斯道如日方中天生蒸民咸啟厥衷質弱氣浮利慾交攻乃背而馳乃瞽而聾孰厚而深孰毅而弘不事

空言體道以躬我觀曾君稟資粹冲處心端夷古人之
風志學雖切不為苟同乃得明師樞衣而從篤志力行
百倍其功心無外思大學中庸壯始筮仕飭已奉公利
澤小施扶衰振窮君曰已哉我學未充篋簞之谷金精
之峯結廬其間嘯詠從容前脩是期後輩所宗胡不眉
壽一疾而終同志寂寥孰磨孰礱晚進滔滔孰啟其蒙
痛哉斯文涕淚填胸

祭楊通老文

嗚呼遊晦菴先生之門者多矣篤實無華強毅有守孰有出公之右者乎居家而兄弟化其和從師而朋友愛其誠立于朝而君相知其忠仕于外而吏民安其仁非天資之厚學問之篤孰能隨所寓內省而不疚者乎觀公之資與公之學所以保其身者至矣而不能享期頤之壽者何也人生一世如浮雲太空倏來忽去不足把玩如公之亡亦可以無憾矣惟其和而誠惟其忠而仁自有不能忘情于公者是則可哀也已榦也辱公之知

最深荷公之愛最厚民社所拘不能奔走以哭公之柩
緘詞寫哀遣子往弔公其尚能鑒榦之衷也夫

祭安慶項教授母文

榦之于僚屬義猶弟兄也愛猶弟之賢傷其母之歿人
之至情也有子之賢有母之壽歿猶生也因夫人之喪
奪賢屬之助淚如傾也

祭李貫之文

嗚呼貫之止于斯耶晦菴先生以孔孟周程之道誨後

進見而知者固有之矣聞而知者非吾貫之耶貫之目不識先生之面耳不聞先生之言顧以為聞而知者亦何自而知耶貫之性資粹美襟懷坦夷凝靜有常堅剛自持則其質固已近于道矣而其志則勇于求道若決江河而東注若輕車駿馬就熟路而疾馳自蜀而來人謂貫之有志乎功名事業而貫之則曰吾將歷東南而求師縱往者之不作有遺風之可追聞晦菴之門人則虚心屈已而與之友得晦菴之遺書則手抄口誦而講

其疑昔之門人雖同堂合席然往來不常或得其一而失其二貫之雖殊方異世旁搜博採乃反總其凡而會其歸而又篤信力行切問近思毫釐必辨精粗不遺故其動容周旋莫不有則出處進退莫得而疵立于朝廷則不知權利之可慕仕于州縣則亦捨民瘼其孰咨至其感慨發憤抗章極論則有犯無隱竭肝膽而歷披向非見道明用心剛而無一毫物欲之累孰肯試身于不測之禍雖百謫而不辭使其在樞衣之列及門之士皆

當斂衽而推服則聞其風而興起淑諸人而有得非貫
之其誰耶貫之之行也以書來曰吾猶少駐康山湓浦
之側以待水涸而泝峽子能一來庶以慰吾拳拳之念
幹亦以書相挽曰子未可以亟行也朝廷清明行將起
子以扶斯世東南之士亦皆望子以振斯道之微嗚呼
貫之乃止于斯耶貫之之歿也有識之士莫不為之嗟
惜視貫之之病者則以貫之病亟尚與朋友講析理義
而不少衰嗚呼此其所以為吾貫之也朝聞道夕死可

矣有得于道則禍福榮辱死生之變若太空浮雲之過
目此何足以為貫之之累顧為斯世惜為斯文惜安得
不情鬱結而涕漣漉

祭林存齋文

居大山長谷之中無耳濡目染之素獨能慨慕乎聖賢
沈酣乎典訓追逐乎師友磨礪乎身心為弟而事兄如
父也為季父而撫其從子猶子也族人觀之鄉人敬之
栗山之陽無百室之聚家弦誦而人縫掖又皆知理義

之訓君之教也吾鄉之士遊晦菴之門歲晚能自守者
不過三數人如君之醇厚質直樂善不倦則又朋友之
所敬愛者也君與予交最善又嘗致予于其里以教其
族子弟故其情為尤親宦遊江湖不見君者十年矣奉
祠來歸君年已七十視其貌猶矍鑠而嗜學之志不少
衰予復以王命守淮邦相期以一年之別尚可以白首
相從而卒所志也孰謂相別未數月而哀訃遽至耶君
既歿而予亦老矣乞骸骨歸田里凡君之所見屬者不

敢不勉行當拜君遺像于存齋而弔宿草于南山之原也嗚呼哀哉

祭李守約文

自先生講道武夷學者紛然迨今觀之非俊偉卓犖方嚴正直亦何足以費夫子之雕鐫彼頑鈍齷齪脂韋軟美雖曰聞善知慕未有不見害則避見利則遷者也求之師門如吾守約兄者是豈流輩之所可並肩也耶早以俊譽蜚聲場屋出其小技所向無前迨其聞道超然默

會且鑽且仰孰高孰堅而一第之微獨低回于壯歲簿
領之卑又復馳逐于蠻烟鞠躬盡力輸忠納善臺府交
薦歛衽稱賢至于十室之聚鳥言務面尤不足以展布
撫摩經理不遺餘力向之憂疑反側者安生樂業驩淫
沸傳政聲賢譽亦既轉而上聞矣庶幾收功于桑榆之
後不惟障斯世之橫流亦以煽斯道于復燃孰謂造物
既嗇于其始而于其將振也而復奪之年嗚呼梁木之
已壞者不可復作矣宿草之可弔者又不勝其悲矣當

齒髮衰頽交遊凋落之際乃復失我良友則歲規警誨將誰是望此所以既為吾兄慟而又以私自憐也

祭陳監場文

天道無親常與善人是耶否耶今則不然善人何夫不善何壽頃子來訪以書見扣讀之疊疊如獲瓊瑤徐而察之夙有良友尚期他年微言細剖一疾而終伊誰之咎謂天有常禍福紛糾謂天無常如在左右觀子南歸不前不後不歿于道路而歿于館人之家不歿于諸僕

而歛于賢者之手則天于善人蓋亦未嘗不厚也諸郎
誥誥先訓是守鄰有明師是誨是誘他日有成子則不
朽莫寫我哀寓此杯酒

祭潘立之文

昔我兄弟與君父子俱以諸生樞趨林李偉哉大儒倡
道武夷悉屏舊習幡然從之空谷春融虛堂夜靜有善
相勉有過相警四十餘年豈無他人與君兄弟神交意
親昔我宦遊君以病止今以倦歸君病不起追想音容

如在目前志氣雄豪化為新阡道則常存因人顯晦師友寂寥興言永慨豈期晚年乃復哭君莫寫我哀酌以斯文

祭趙壻文

維兩橋之天派昔固知其多賢迨結交于諸父偉聲望之卓然故一語之契合締二姓之姻婭及吾子之受室儼諸老而齊肩幸季女之有託庶舊學之可傳覽別後之貽書覺向道之彌堅方得子之足喜胡一疾而沈綿

執訃書而長號灑老淚而連連想庭闈之愛戀與孀幼
之哀憐願一伸于弔唁病支離而拘牽遣長子以代行
情哽噎而莫宣

晦菴朱先生行狀成告家廟文

榦竊惟先生之道高明廣大非後學所可摹寫榦之鄙
陋愚暗尤不足以仰窺萬一固不當冒昧執筆以為先
生之玷伏念先生資稟學問道德行業學焉而知之者
蓋少知而能盡其蘊者又加少老成前輩凋零殆盡既

無所考訂而歲月浸久傳訛襲舛則上無以明先生之道下反以啓後學之疑此其獲罪又豈但不揣分量而已哉于是追思平日聞見定為草藁以求正于四方之朋友如是者十有餘年一言之善則必從一字之非則必改遷就曲從者間或有之褊愎自任者則不敢也蓋合朋友之見止于如此則亦稍足以自信至其甚不可從者隱之于心而不安質之于理而或悖則尤足以見知德者鮮而行狀之作不容以自已也行狀成于丁丑

之夏然猶藏之篋笥以為未死之前或有可以更定者如是者又四年今氣血愈衰疾病愈甚度不能有所增損矣謹繕寫一通遣男輅白之家廟而併布其僭妄不得已之愚撫卷興悲涕淚如雨

辭晦菴先生墓文

幹至愚極陋之人先生不鄙而收教之涵淹卵育于困窮惇獨之餘父兄之于子弟不是過也先生不以是為有德于幹幹亦不敢以是而歸德焉理義之淵微問學

之精密顏曾之于洙泗尹謝之于伊洛皆一世大賢也而後有聞焉榦獨何人而在樞趨之列耶公平正大者先生之心剛毅勇決者先生之氣嚴威儼恪者先生之容精深廣博者先生之學耳濡目染朝薰夕炙者三十年榦獨何人而獲親道德之粹耶既示之以精微復開之以博大既廣之以聞見復約之以踐行扶而掖之惟恐不進培而植之惟恐不立榦獨何人而受此生成之賜耶空谷春遊虛堂夜坐一行之孚一言之契未嘗不

欣然以喜至于末年之付囑將歿之叮嚀則戚戚然大義之乖微言之絕也榦獨何人而當此期望之厚耶先生棄諸生二十有一年榦也不能安貧自守而仰祿於州縣黽勉王事固不敢違先生之訓然講習之功廢于朱墨持守之志奪於應酬歲月蹉跎而老及之矣朝廷憫其衰病畀之祠廩而予之歸杜門省過翻閱舊學而神識昏眊疾病支離追念初心涕零如雨何先生愛遇之厚而榦之負先生乃至此耶師儒難于並世歲月不

可再得惟有抱終身之恨而已矣自今未死之日尚當
勉策疲駑不敢自怠居敬集義致知力行體之于身以
勉同志庶幾收桑榆涓埃之益尚可見先生于九泉之
下耳榦深願一拜先生之墓然後退而待盡數月以來
痰作於上氣痞于下恐一旦遂溘先朝露謹遣男輅告
于墓下惟先生其鑒之

祭某人文

難明者道難遇者師從師問道難得者資志堅行篤道

奚遠而自我夫子講道武彞豈無他士踵門樞衣嗟君
之來婦啼子悲交遊怪訝閭里笑譏君獨毅然如救渴
饑問君之年二毛鬢垂何見何聞果毅不疑上堂請業
切問謹思下堂取友片善不遺如榦之愚尤君所推君
之為人實惟我知性資謙和襟懷坦夷持身若法觸事
敢為義動鄉閭恩撫窮廢盜不過門人誰忍欺求之古
人庶或似之胡不永年而止於斯師友相顧齋咨涕洟
自君之亡弔不及惟葬不哭墓銜哀坐馳君嘗語予吾

力已衰惟我二子他日可期而與之遊切磨箴規尚期
他年無愧此詞

代祭林黃中侍郎文

嗟往哲之垂訓曰剛毅其近仁苟緝熙以學問庶德業
其日新相彼頹俗與波俱淪不為丈夫偉特之節而脂
韋軟媚以效兒女子之態不觀聖賢作經之意而剽竊
摹擬徒欲以媒其身若夫剛正不懼仕優而學求之斯
世如公幾人嗟哉我公受天勁氣為時直臣玩義經之

文象究筆削於獲麟忘齒尊而爵貴常矻矻以諄諄至
其立朝正色苟拂吾意雖當世大儒或見排斥著書立
言苟異吾趣雖前賢篤論亦不樂於因循觀公之過而
公之近仁者抑可見矣論者固不可以一青而掩其大
醇也其試吏長沙低回下陳辱公見知相待如賓雖公
事之屢忤然既久而益親何一老之不遺淚琅琅而沾
巾承乏仁里有社有民小智大謀危辱旋臻所望以問
政于公者今不可復得矣陰相而默護之者尚有賴於

在天之神

祭章翼之運使文

幹也筮仕二十年所歷六七郡竊觀當世人物於百里而求一賢令於千里而求一賢守於一道而求一賢使者嗚呼何其難也其吾某官章公乎蓋天下之人物潔廉忠信者未必通于世務通于世務者未必潔廉而忠信者也徒潔廉忠信者而不通於世務謂之賢可也民有不被害者乎通於世務而廉潔忠信之不足則所

謂世務者豈能盡出於公且正乎若公者潔廉忠信而
通世務者也

勉齋集卷三十九

欽定四庫全書

勉齋集卷四十

宋 黃榦 撰

詩

答曾伯玉借長編二首

白露下百草迅商薄脩林幽人起長懷感此節物深攬
衣自徘徊撫劒還悲吟丈夫各有志莫作兒曹心涉遠
當疾趨畏景須就陰願言理輕車去上南山岑

其二

祥麟踣魯郊孔袂何漣漣傷哉經濟心付與文字傳馬
公述孔志托意為編年是非一以判纖悉不復捐聞君
卧丘壑繭手磨丹鉛願言得其解努力希聖賢

紹熙庚戌十月偕趙仲宗舜和潘謙之曾魯仲
遊九峯芙蓉壽山紀行十首

九日早登桃枝嶺

登山豈不樂屬此風露清排簷夜雨滴詰旦天空明歡
然金石交要我林泉盟支筇趣汗漫勇往不計程一水

何縈紆千峯鬱崢嶸仰視流雲馳俯聽幽壑鳴班荆得
所適斗酒聊共傾人生會有累聚散如浮萍今辰諧勝
遊異日難忘情意愜各賦詩庶以紀此行

道間觀瀑布

行行益以遠愜此心期幽一徑險復夷千林密相樛回
首天際山矗面懸飛流銀潢倚石壁玉龍下山湫光搖
日璀璨勢激水颼颼可望不可親神往形獨留眷言桃
枝山久矣卜築謀豈無一日閒努力窮冥搜

夜宿九峯寺

冥逐歸雲入遠山，九峯環立似人間。
摩娑石刻元和體，矍鑠僧譚宣政間。
往古來今渾昨夢，隻雞斗酒強開顏。
明朝酌取龍湫水，直上層霄不復還。

十日值雨

催粥華鯨徹翠微，覺來屋瓦白差差。
初疑淡月霜天曉，忽失前山雲幙垂。
田父腰鎌禾欲耳，行人策杖足如錐。
老僧莫笑芒鞋苦，破釜生塵儂更悲。

早觀龍湫

夜宿羣峰裏朝遊大石湫
寒潭飛薄霧疊障瀉洪流
側徑蒼苔滑叢祠古木幽
神龍好高卧雲雨不勝愁

宿芙蓉寺

萬疊雲山踏雨來白雲依舊冒山隈
尊罍罄盡客懷惡衣屨沾濡僧意猜
默坐香爐煙起伏喜聞靈洞石崔嵬
五更清磬丁東響參斗橫空天四開

十一日早登靈洞巖

寒巖突兀山之阿足履危磴攀藤蘿巖下清泉響環珮
巖前古木交枝柯當中洞門忽開豁上有石屋高嵯峨
乾坤開闢已呈露鬼神守護頻揮呵重門黯黯不可入
以火來照所見多出門小洞亦奇絕神龍奮怒吞蛟鼉
勝景如此難重過手倚石壁頻摩娑安得雄思如懸河
長吟大詠仍高歌

過翠微院

古寺殘僧少孤村碧樹圍明朝山下路愁絕望烟歸

十二日復歸挑枝嶺

大溪章溪溪水清上寮下寮山路平三山屹立相犄角
百里連亘如長城仰干雲霄不盈尺俯視天高浮寸碧
開雲吞吐溢澗谷飛泉噴灑下石壁中有一山名芙蓉
端冕正色羣山空望之可敬不可慢僧言直與衡嶽同
坡陀突兀作雲洞虎豹蹲踞棲鸞鳳聞道前山開闢日
曾住浮屠幾千衆我來已作五日行皇天一雨復一晴
穹林杳靄非人世手接羣仙上玉京曉來更向山前去

忽到山翁棲隱處却憶桃源洞裏人日出烟銷忘舊路

壽山

石為文多招斧鑿寺因野燒轉熒煌世間榮辱不足較
日暮天寒山路長

凡今之人莫如兄弟詩

并序

昔我伯氏披斬蓬蒿以築宅于箕山之陰有
隱君子焉曾其姓者遇諸塗班荆而語相樂
也謁其居有迎門而肅者客入長者坐而少

者侍少者請而長者諾相敬如父子相歡如朋友問之曰吾兄弟也見其二子焉則在韶亂間而已能差肩握手如成人矣伯氏歸以語諸弟相率而往見之余家距箕山幾一舍歲月之往必館于曾舍如歸焉視其兄弟之愛猶一日也二十年伯氏蚤世而二公者亦相繼以歿獨其二子既冠且娶刻意問學而樂與吾兄弟者遊察其相愛之情猶二父也

余甚愧其為人樂與朋友道之夫人倫之愛亦大矣固人心之所不能已者而余於曾氏父子獨有感焉今夫富室衣暖而食飽不私其有而與天屬均焉宜若無難者而世之爭錢財相鬪鬪者往往皆富室自余造曾氏之門而四壁蕭然有人所不能堪者而再世相處皆能樂其愛而忘其貧其亦可道也夫其得無所愧也夫紹熙庚戌之冬余與友人趙

仲宗趙舜和潘謙之遊九峯芙蓉觀龍秋靈
洞過壽山翠微以歸曾氏之季子魯仲偕行
過其家飲酒樂甚相與賦棠棣之詩而掇其
間凡今之人莫如兄弟為一詩以嘉其事魯
仲復屬余序之因書本末如此以自警云

物理須深玩人心定不凡
棣華春競秀鴻影暮相銜
天性人為貴同胞豈異心
疾行迷後長思昔更傷今
憶昔孩提日堂前聚戲嬉
利心驅逸馬分背欲何之
富貴真

餘事兒孫亦後身
四支先自賊駢拇
若為人矢束折應
難葉密根無托斯
道固昭然歎息人
何莫儒衣而儒冠
滿口談詩書君看
闕牆心異類誠不
如我行箕山顛上
有賢弟兄高節振
頽俗餘芳丐後生
二父及諸郎異世
真一體賦詩豈遺
君自以警不弟

遊鼓山登大頂峯

辛亥夏

登山如學道可進不可已
懸崖更千仞壯志須萬里
平生石鼓懷獨酌靈源水
我我大頂峯欲往輒中止
今朝

復何朝擊楫渡清泚好風從西來縹渺吹遊子褰裳涉
危巔萬象得俯視東南際大海日月旋磨蟻烟雲隔洲
渚歷歷猶可指城中十萬家囂雜不到耳郊原與廛市
瑣碎如聚米同來皆良儔得酒共歡喜深林更叫嘯磐
石恣徙倚摩娑陳公碑歲月為我紀更持末後句歸以
銘吾几

陳烈先生登此山紀歲月于石上其
畧云鼓芳巔鼎峯特歲辛亥帝司赤

雙髻峯

萬山環立兩山起伯仲壘麓風味多軒冕直能驚俗子

采薇千古不消磨

侍晦翁飲浮翠用劉叔通韻

涼風振幽壑陰雲翳前山高懷勵清秋適意林莽間烟
橫黃家井水淨霞溪灣徙倚暮忘歸人境相與閒遊子
獨何為千里方言還陪此杖履遊忘彼道路艱心期更
他年依巖結柴關

讀史記荊卿傳

說與男兒莫愛身簞瓢陋巷不為貧古來豪士君知否

拚得頭顱斫與人

食竹龜

北山何嵯峨猛虎之所藏咆哮一震怒百獸不敢當有
竹山之阿挺挺青琳琅威鳳鳴且棲衆鳥空回皇彼龜
獨何為莫夜爭跳踉鑽山窟穴深嚙竹根本傷鼠腹漲
彭亨鵠怒獨奮張誰知樵蘇輩歎彼枝葉黃鋤耨擣其
室束縛登我堂遂令婉孌者污此牙頰剛才質既不同
分守合有常曷不效爾曹竊食仍循牆直節永蕭森庇

此千仞岡

讒人

監謗兆周蹇偶語擠秦亡古風下刺上國步安且強靖
康發深痛熙豐啓餘殃惜哉天子明未免讒者傷讒者
亦何為同子名愈彰

生平

生平因寡合歲晚交更少非干世俗薄自是志量小

拜文公先生墓下

暝投大林谷晨登萃如亭高墳鬱嵯峨百拜雙淚零
白楊自蕭蕭宿草何青青悲風振林薄猿鳥為悲鳴
音容久寂寞欲語誰為聽空使千載後儒生抱遺經

答劉正之見招四絕

求田問舍兩參差木壞山頽萬古悲
多謝劉郎能館我短檠疎雨聽清規

昔年曾學屏山下炯炯胡劉風味長
滿目青山非故國人生熟處尚難忘

君因慙直招時論我以疎愚厭俗紛萬事不須開著眼
蒼山白醕對西曛

石馬臺邊森古木畫寒亭下鎖晴烟紫陽不作遠菴死
一醉同君話昔年

讀史戲呈劉正之

君不見漢初曹相國日飲醇酒不事事相舍後園近吏
舍黥吏醉呼不肯避相國取酒飲園後恨不呼吏與共
醉又不見後來丙丞相馭吏不畏丞相嗔嗜酒酒翻車

上茵醉飽去爾何容身兩公一心相有漢一夫見辱非
吾患但得時平酒價賤從渠醉後來相慢李斯逐客徒
自尊東門黃犬還悲辛西曹地近不足貴不過能汙車
上茵人言兩公固寬平我謂兩吏非庸生庸生無益兩
丞相故辱丞相成其名至今漢家四百載曹獨為冠兩
有聲劉侯劉侯汝太癡世間曹丙能幾箇但知憤世快
我意醉語誰知官小大却來東屯起田舍日與田翁相
唱和人道劉侯只是一醉人誰知胸中自有渭與涇一

雙怪眼如老鷹每於醉後白復青劉侯藏鋒斂鍔莫妄
用君家自是提兵冠豸種

和魏元明四月菊

鵜鴂纔鳴歇衆芳忽看佳菊變秋光江頭雨漲梅同熟
隴上風清麥正黃莫待重陽拚一醉不愁長夏自微涼
籬根休遣兒曹見又說梨花捧壽觴

和劉實之喜雨

忽忽久不樂中腸若焦焚非無一樽酒高堂細論文塵

俗了不知學殖聊自耘念此農事畢膏雨猶未均東郊
與西疇禱旱胡紛紛長年四月時蝸舍嗟梅蒸旱魃逞
威虐暘烏麗朱明風伯真可訟田祖非無神曷不駕飛
龍一息萬里奔兀坐正長吁仰瞻白雲屯須臾梧桐上
策策琅玕聲清溪一綫流瀕洞如盆傾只此一日澤便
想百室盈呼童索濁醪為我驅愁襟珠玉忽滿前語句
何清新此意久不傳舉坐為君興鷄蟲無了時江閣聊
自憑竊恐讀君詩愁殺閑糴人

再和實之喜雨呈正之

苦海渺無涯火宅常自焚青衫不療饑白首非工文勉
策疲駑姿舍已為人耘造物真小兒苦樂胡不均突如
四月時梅雨成炎蒸安得玉燭調一晦復一明中夜忽
自悟感慨若有神有名汝不趨有利汝不奔獨與迂濶
友卜鄰向東屯燕坐想羲皇浩歌發商聲床頭有濁醪
嘯詠聊自傾又如苦旱中一雨澗壑盈草木回春姿萬
象皆更新君今東屯成拙寢復幾興我亦側西流草閣

時共憑長想千載上依依耦耕人

和劉實之寄生日

朝來謾與兒曹語欲看羣峰插天宇攜筇直上君子堂
出門復向東屯去東屯田舍翁邂逅成賓主謂予始生
朝盃盤各碁布須臾剝啄者為誰珠玉懷中來舉似滿
堂賓客且停盃看我蓮桃羅十數感君厚意興轉逸百
斛瓊漿當鯨吸造物亦何意萬品齊結實休論脩與短
大是空中色但願雙橋茅屋成欸段從君豈終極

劉正之宜樓四章并序

劉正之創新居以宜名其燕處之樓謂其春秋
冬夏無不宜也同志之士既已共賦之矣
予因採詩之四宜以廣其意焉一章言宜其
室家也二章言宜爾兄弟也三章言宜爾子
孫也四章言聲無不宜也讀之者亦足以見
予與正之道義相與之意云

其一

春風滿庭除琴瑟亦靜好甕中有歡伯相祝以偕老

其二

屏山重回首日暮起長思鴻鴈來翩翩共賦棠棣詩

其三

君家兩寧馨翠竹棲鸞鳳莞簞燕新居孔釋復抱送

其四

山以靜故高水以靜故深福祿豈外求萬感皆人心

與胡西園

伯履

白露下百草玄雲翳崇岡遊子莫何之倏若孤鴈翔朝
發長沙渚夕息湘山陽飛鳴念儔侶慷慨增悲傷故人
懷我深遠寄金玉章開緘且疾讀慰此饑渴腸是時惇
中火朔風掃枯黃歲月能幾何皋蘭結微霜靜觀天地
間至理何昭彰乾行固不息坤應還無疆兩曜各循環
皦皦臨四方人道政如斯願君勉其常脂車策良馬日
暮道正長徒僕審驅馳前途畏榛荒劣質苦難任白雲
懷故鄉南山一舍隔動若參與商大舶漾中流矯首空

西望昆弟真可人行樂毋相忘

嘉興道間二首

平生事幽貞足跡不出門歲晚迫飢寒暫得媒約言

其二

征途不寐輒終夕故里無書今幾時離別因知雙鬢改
飢寒解使寸心悲

謁陸宣公祠於嘉興府學門外二首

年來風俗軟如綿再拜公祠氣凜然莫是平生太忠鯁

只今猶斥學宮前

徘徊無處謁精廬義膽忠肝一卷書昏主亂時公尚爾
清朝平世合何如

石門

吳越天下富京畿遊俠鄉隴畝盡膏腴第宅皆侯王世
言蘇湖熟霑丐及四方自我來石門觸目何淒涼清晨
開務門有酒誰復嘗累累挈妻子汲汲求糟糠父老稱
近年十載嘗九荒聚落成丘墟少壯爭逃亡

闕

訪高僉判所居

遠樹分高下平洲半有無
短亭低密竹小艇隱寒蘆
轉浪魚深入斜陽鴉亂呼
自慚貴公子未老賦歸歟

甲子語溪閔雨四首

檣頭五兩搖空飛船頭百丈牽
何遲數篙塘水清可涉
故鄉千里歸何時

塘中龍骨高數層龜坼田中縱復橫
青裙若笠倚車卧
但有空車無水聲

生女盈盈河漢傍清風肅肅吹羅裳朱門達旦聽歌曲
莫遣濃陰蔽夜涼

老夫年來百不悲夜聽羣兒聲吾伊呼兒握手長太息
不見儂家數口飢

喜雨用前韻

莫愁塵土厭天飛六月栽田未是遲待得麥麻收拾後
通宵好雨定知時

雲霓天外起層層畢月相隨徹夜橫費得天公能幾力

數州愁苦變歌聲

睡覺歌聲古道傍有人中夜攬衣裳
床頭斗酒聊自酌不為書牕一夜涼

山中書生休浪悲燮調自有臯與伊
清香一瓣來天竺

更把民飢作已飢

予前兩夜月次昴宿因與兒輩言更一兩日當離畢則雨後果然

又用前韻謝華宰并序

効官語溪與金華鄭君聯事相好也
葉明府鄭出予未及識之適有以予
閔雨四詩呈似

者不鄙而和之輒以為謝且致予懷舊之意

云

誰推雙轂遶天飛短髮蕭疎蚤是遲腸斷金錢門外月

曉天秋露稻花時

余嘗侍東萊先生出金錢門觀稻花甚樂

明招古木葉千層山自浮雲溪自橫春樹鶯藏無覓處

遺編燈火屢吞聲

明招東萊先生所葬之地

歲晚投身糟甕傍旋除野服著公裳折腰可愧更無米

贏得虛堂一味涼

世事年來最可悲，開口不得洛與伊。
兩君論交大左計，芋栗不足充人飢。

噫嘻示兒

噫嘻吾退不能為高蹈之靖節，吾進不能為玩世之東
方。腰折亦無米五斗，餓死安得粟一囊。徒令汝曹困糝
鹽，對我面目青且黃。冬寒輕裘不得御，朝飢軟飯不得
嘗。大兒知書故自忍，小兒呌怒來牽裳。老夫對此忽自
悟，呼兒并集來我傍。人生窮通固有命，丈夫志氣當自

強

送宋知府歸閬州

丈夫不遇歸西州天遣旱魃為王留誰知冥鴻向蓬華
一使深鷗膠淺流載書萬卷堪自樂端坐十日吾何憂
使君高懷不可挽飛廉驅雨扶君舟君今捩柁清江頭
江漢滾滾來為浮張帆掛席日千里巨魚豈戀尋常溝
浙江舟行遇風

扁舟泝浙江日暖天氣清胥濤寂無聲篙工掛席帆涉

險如履平不謂時適然自詫伎已精中流捨維楫醉卧
日月橫烟雲忽異色亭午風浪生兩涯忽黯淡一葉隨
欹傾津人巧不施反念西佛名同舟已自訣立葬東海
鯨雨聲忽自霽霧暗忽復明舉酒迭相賀驕氣又已盈
同舟幸身安氣塞莫敢爭誰知翻覆手頃刻分陰晴既
乏共濟力拂衣起徒行

和江西王倉中秋賞月韻

明晦從渠造物慳好天佳月靜時看一輪天外長明徹

萬象胸中自屈盤星逐使來隨處見霜侵臺迥逼人寒
休觀玉兔頻頻擣活國須公九轉丹

勉都幹權君

并序

都幹權君明醫相之術相與浮江淮握手逾
月言論豪放世罕識之者亦隱於技耳賦詩
以勉之

長安城中豪俊林錦韉玉勒馳駸駸入門朱粉誇妙麗
出門青紫爭浮沈東家問醫西問相君獨燕坐鉤其深

冰眸一睨窮達判刀齧不許寒暑侵長安城外天陰陰
行人駐馬為悲吟高墳崔嵬葬白骨安得不死腰黃金
世間萬事何足恃禍福倚伏常相尋渠儂自愚君自強
誰肯一笑忘華簪蜀人賣卜嚴君平垂簾閉肆窮古今
逢人但說忠與孝自有達者能知音察形察色君所解
直須洞燭賢愚心屈伸壽夭亦命爾公平正直神所欽
送章元德司理罷官歸永嘉

送君北門阪遙望東甌路我我白鶴嶺渺渺飛鸞渡上

有虎豹嗥下有蛟龍怒車馬堅且良維櫟夙已具褰裳
涉其險萬怪不足懼世路劇羊腸皦皦誠易汙但能心
無愧窮達安所遇毋為婉孌者暫蹶輒驚顧生平麋鹿
姿處世每多忤胡為展良覲握手便如故高懷發鍼石
正論諧韶濩情親復告別欲語誰與晤乾坤一逆旅日
月雙脫兔寒儒守蓬華白首困章句期君以遠大庶足
慰遲暮

謝潘謙之二首

生平不作溫飽計歲晚寧愁衣褐無一夜嬌兒啼徹曉
始知寒色已侵膚

綈袍戀戀故人情寒谷瀟瀟春意生寂寞窮儒應易足
牀頭鼻息便雷鳴

慶元己未冬至前二日訪林公度至栗山翌日
同訪吳必大林季亨容之偕行愛其溪山池
亭之勝為之賦詩

篝火下脩嶺褰衣涉清川夜投故人廬洞壑藏真仙一

水遠縈紆兩山對蜿蜒但見烟雲深不識車馬喧主人
敬客至盃酒羅堂前諸孫競勸酬烹羊雜雞鮮同來二
三人妙語爭春妍此會良獨難達旦不復眠雞鳴秉燭
遊到君新池邊中有讀書堂藏書足精研把筆記姓名
徘徊悵無緣天明驅車去去上層岡巔回首三歎息安
得數畝田結茅與君鄰嘯傲終殘年

會南禪遊鄒氏園和知丞韻

并序

長至後三日約同官會南禪登浮圖遊鄒氏

園以歸知丞以佳篇見屬因和其韻併簡同
遊諸友

盃酒聯翩臭味同橫枝疎影費天工千秋落木人烟絕
獨倚斜陽對晚風

寄鄭維忠葉雲叟諸友

并序

諸友九日遊上巖老病不能相陪小詩寄鄭
維忠葉雲叟諸友

村村簫鼓競龍舟
萸菊巖前倚晚秋
老懶焚香書一卷

淡烟疎竹月侵樓

宿廬阜題正覺禪師

稽首歸宗正覺師長懷千里鬢如絲
早知具眼畚成閭不作人間了事癡

挽雲門鄭君

結友雲門日曾聞谷口翁松肥三徑雨
鱸熟一絲風行業鄉閭敬詩書子姓同
論心獨餘恨秋草對碑豐

挽潘孺人

聞說初年失偶時
回看囊篋鬢成絲
誰知舊室如新室
解撫前兒似後兒
南澗蘋生方得助
河陽花落不勝悲
高樓百尺今休上
望著佳城空淚垂

紅雲照水春將暮
皓月盈盈院落深
正是佳人行樂地
翻令公子獨傷心
床頭琴瑟空長在
眼底音容無處尋
寒食紙錢飛滿野
一聲薤露涕沾襟

挽新市張監酒三首

曲江人已矣
風采獨依然
薄宦何曾顯
英名到處傳
諸

公交薦士造物竟遺賢窮達君應悟怡神向九泉

其二

捧檄來新市逢人說舊官臘殘千醖熟春到萬家歡不見文移急惟聞酒禁寬摩挲石梁柱俛仰歎才難

其三

淡薄心無累行藏惠及人詩書長孫子雍睦化比鄰我亦塵中客來司甕底春從公得遺範惆悵重書紳

代王維謹挽李察院二首

關洛蕭條南渡日龜山往事屬龍津
過庭詩禮傳宗旨
蓋世功名付後人
風憲隻身中
與外清忠壯節晚如新
崇蘭香歇玉剛折
定與天皇作侍臣

牛角短歌頭半白
龍門峻級眼常青
一官多是春風力
千里俄驚秋淚零
坐想德容今寂寞
夢回耳語尚丁寧
夜臺雖閉公長在
有子能存舊典刑

代曾魯仲挽蔣同叔母二首

釜竈朝晡百儉艱
危區滄海隨悅慈顏
欲知婦順妻賢處

盡在姑啼夫哭間庭下芝蘭方擢秀堂前松檜未應慳
空餘馬鬣崔嵬在及見春風衣錦還

不樂何蕃歲一歸歐陽越客飽京師

註見韓文

腰間未許印

如斗堂上還驚鬢已絲男子但知三釜計人生合是百
年期他時此恨憑誰說見著魚軒心轉悲

代李亨二首

粉榆接影一牛鳴淑德相傳到後生三世隻身長婉婉
兩兒雙淚遽縱橫蘋蘩春澗情何切機杼秋堂眼倍明

細讀古文賢婦傳誰家駢女亦書名

慇懃慈母手中線縫作行人身上衣待換青衫朝日去
誰知白帽帶星歸別時早覺終天訣底事能堪跬步違
一路顯親須努力九原荒草恨依依

代良夫人二首

早歲為儒讀國風夫人高節有誰同至今桑梓傳家法
便說蘋蘩力婦功閨內衾綢長自苦堂前滄海得能豐
欲知淑德碑何在只聽鄉人嘆息中

聞道夫人遣子時，丁寧捧檄是歸期。
青衫到手非難事，白髮驚心祇自悲。
長髮忍聽蒿里句，短檠休唱蓼莪詩。
九原精爽應長在，列戟松楸莫恨遲。

挽李尚書母太淑人

少壯聞忠孝，生平閱險夷。
篆烟長寂寞，騶從任驅馳。
塵俗渾無染，湖山每自怡。
儒冠慚佛學，列婦勝男兒。


其二

紫橐光先烈，青衫拾世科。
家聲今益振，母訓昔應多。
方

聽焚舟誓俄聞鼓缶歌定非孫與祖一戰一言和

其三

粉社傳家範堦庭著義方能令鏘劒履爭欲倚門牆么
麼真無用提撕獨異常登堂今已矣收淚轉淋浪



勉齋集卷四十